

四庫全書

集部

欽定四庫全書

集部

淳熙稿卷

三五

詳校官庶吉士 臣 吳烜

主事 臣 呂雲棟覆勘

總校官編修 臣 朱鈐

校對官中書 臣 吳樹萱

謄錄監生 臣 廉永倫

欽定四庫全書

淳熙稿卷三

宋 趙蕃 撰

五言古詩

天簾竹

自離竹隱居借宅亦多種周旋雖不乏瀟灑常入夢倚
歟此窻綠輟自口腹奉別之亦幾年似困烏雀闕茲晨
甞來歸漑掃何妨痛竹隱從未還風猷入吾用

悼竹

此君如高人風節常凌厲雖經隆冬中正色不少替春
今盡正月萌蘖且次第天公出竒手白晝變昏翳初飛
佛場花繼灑鮫人涕羣兒顧驚走老眼亦睥睨是時凡
草木掩抑若自衛惟君獨傲然畧不威嚴霽太剛竟摧
折乃悟非善計追懷周旋久於此增慄悵其生既寃死
其死可輕弊當為殺青簡更以色絲綴畫書卓行人出
入生死際作我座右銘斲能免於戾

次韻斯遠投宿招賢道店對竹再用前韻見懷

二首

興懷王子猷匪但一朝夕看君愛主意與渠蓋連璧詩
成辱持贈絕勝梧桐滴我句本非儔分光藉鄰壁

君行日未昏意適先投宿世有疾走人奔波寧自足遙
知琢詩際聲韻驚鄰曲寄謝主人翁取將宜刻竹

來詩
述店

旁大竹
可愛

明叔以僕護筍不除作長句為調次韻

春風逞天邪爛漫吹已足維暮筍乃生如亂更約束吾
人為之寄詎可謾弗錄況其耿介姿政已不可辱去云
解箨後為我呈新綠新詩急拜賜句解先我欲我豈兒
女曹撫玩斯同俗又殊市井輩狗利蘄盡刷要當去留
間明見妨意曲分餉可得多但令春脫粟

有懷竹隱之筍復用前韻

我家章泉旁生事苦不足惟餘數畝地有竹森似束別
來夢寐之詩語見編錄況當萌茁時孰杜樵採等官居

亦何有有此數竿綠定應好事人知我來此欲不然朝
暮間何計能醫俗尚嫌地形淺筍黠當掘斷不能助幽
深何況增詰曲袖短舞難長吾俸五斗粟

徐提幹為沈運使種竹於上饒新居昭禮有詩

蕃同作

玉谿佳山水不減閬州南新居助幽深所欠萬竹叅徐
郎亦好事知公幽趣耽過溪買龍雛雲根破烟嵐地形
擇便宜土壤泉亦甘春雷一番筍要戒園翁饒鄰里約

來往要須開徑三風月無常主平分未為貪定有王子
猷造門不與簞嘯詠忘主賓用意端不凡政爾功名迫
此事未易譚待公幅巾歸我亦脫青衫

至節矣猶未見梅頗形思渴書呈斯遠滕兄主
簿前日書來亦問梅花消息併此奉簡

言歸雖故棲雅志亦良友奈何數詩筒不得屢杯酒縱
云三十里每見莫能久是以朝暮間相思輒成又去年
梅花作佳處猶在口今年梅花期撫事纔轉首翩思接

巾屨兀若隈林藪君行集彤庭我政安甕牖西湖覩林
逋東閣懷杜叟寒歲識松堅同心見闌鼻前朝習鑿齒
書來問安否併話羅浮山抗塵應抖擻

三月三十日余有章貢之役陳明叔嚴從禮載
酒見餞於白泉張伯永繼至

相從數月間已復兩為別此身竟何有百年終是客近
役不隔州音問可絡繹江南虛成市白泉強名刺何勞
共追餞令我滋不悅觴行期月上月上尊已側我卧四

金匱山房集
卷三
壁空君歸度舟閣

僕自北門放舟過溥子而告行坐間出示上蔡
景迂兩先生墨帖具道先世契之許益重其別
為成是詩

扁舟過辭君落日繫高柳愧君惜遠別留我飲以酒夜
深不知罷感歎屢執手書題見晁謝光恠森在牖憶昔
蓬山老實與文靖友同登靖康朝諫疏猶在不吾人世
其家樹立敢自後君才真杞梓如我乃枯朽漂流偶相

值稱我不容口君今非少壯我亦驚老醜相逢定何日
相免敢不厚老農誠有言良田務除莠

中秋無月呈審知

前年中秋月病鬼方見虛徹曙不得眠搗爐親煮藥子
時過橋來勞我非赴約評詩雜精粗有味勝大嚼去年
中秋月應候病復作少休塘下寺欲進悲足弱喬松接
修竹聽雨仍落落

喬松聽雨
與二堂名

徘徊亦忘寐孤詠同緯絡

漂流到今年高興屬快閣何期悼忘歸舟並南山泊前

年呻吟地追隨光如昨天公似憐我為遣雲垂幕那知
千家瘁慘澹對杯酌不然適與值用趣則相各人世夫
何常明年定憂樂

邂逅孫子儀於臨安喜而賦詩併懷子進子庸
車塵高没人欲障無能施忽逢故人面如濯清漣漪客
居縱荒涼聊復具酒卮勞苦數語外論事仍索詩長年
口欲棘一笑為解頤懷哉二難兄何由會塢麓

次韻斯遠入城見迎

舟纔汭口過山已鵝湖出櫓隨鵝鵲興纔與鷗鷺夕青
青玩魚藻爛爛數灘石經行盡吾舊佳處悉不宅有身
漫漂流有志空鬱積題詩喜將見重子深垂憶吾儕信
老大觸事異疇昔君能師友偕我媿灑掃役歲月又何
如駸駸戒輕擲

九月晦日艤舟浴於昭真既罷同方元直成父
弟兒姪遊徐巖南禪之新亭已乃絕溪而還

客子下水船幽士登山屐二事莫與謀聊復盡此日山

房富薪水泥瑾仍紙罽沈病快一洗清吹生兩腋徐巖
舊所訪舉步能厯厯樹樹雖剪伐苔蘚更襍積蓋可買
以居惜哉無巨力旁誰斫幽徑復道精廬立新亭踞其
上遠水山四壁驟來落日挂忽去昏鴉集不惟我友俱
携子仍弟姪民生固常苦此適未易得物役不可留溪
流還汰擊

文叔兄以泉州丈之亡自萍鄉奔赴歸途以書
約相見會蕃留邑中得以合并時復聞袁州先

生之訃哀傷之餘詩以叙別

一雪五日陰冰凍吹不裂今晨定何朝萬里來霽色我
將還山中已駕還復輟故人有書至會面不可失故人
江西吏何為浙東役慟哭竹林迴我實門下客去年送
朝天除書報三易心知以病辭豈料成死隔東懷喪未
赴西望訃復得追惟平生遊語淚相隕雜僧房幸小駐
聊以舒鬱結酒固不成懽梅開況當說

水淺

歲暮百日常江水三寸淺寒裳步可涉石子大如繭沙
乾蒲莢死穴遼魚龍偃會看桃浪來一碧千里遠

贛縣道中有懷晦菴用江東日暮雲為韻作五

詩寄之

我行向何許貢江與章江悠悠異所見俗變服亦龐定
遷本中州來南已殊邦況此接荒服寸心那得降

此心如江水日夜東復東不惟愛吾廬顧瞻幾臨風今
者歎段馬向來御史驄在我何得失人自分悴豐

自往一寄書俯仰又許日豈無東歸便值遇多辛辛昔
如馬口銜欲去隨緩疾今者身屬人動步窘刀筆

去年過辭公忽忽值春暮及今復茲時而公在何處荆
溪坡之居瀨上郊所賦公能躡高蹤我豈遺野趣

半出未吐日徐行欲歸雲豈惟陰晴殊政自涼燠分物
態故應爾天機寧亦云安得變淑氣盡為除楚氛

晚行

侵晨畢先祀將午趣蔬飯中逕往固宿顧影曰未晚透

進行不盡登頓力苦倦馬言雖不通吾意其自報

施衢州除浙西提刑以詩寄錢三首

昔公立螭坳秉筆罔不書及乎上諫坡論議無曰虛直
言有不離柴桑念歸歟高卧屬幾日朱轡起閭閻政成
合入奏返直承明廬如何更持節未便經綸攄上心豈
無謂勞公重皇居吏惡必剪刈士良必吹噓此自宰相
事於公定何如

六飛駐吳中地實三輔比擇守固甚艱況於部刺史惟

公治衢州他郡益無是豈惟教條清坐見風俗美邦畿
四方本王化所自始俾公按連城此責亦重矣繡衣非
古官漢乃有直指於今盜賊清所繫獄事兩讞議局以
平遺公孫若子

我客懷玉山有如梓與桑地故隸江東與衢益鄰疆自
公剖符來亦既閱雨霜非惟衢人安我民亦小康去年
旱無收閭里驚欲惶匪藉衢粟輸烏能免流亡嗣聞被
災郡誅賞率亦當況於惠叱境於今見何嘗事雖鬱上

聞我民不公忘

去年玉山大旱
賴衡粟以濟

偶用不才明主棄多病故人疏之句感孟浩然

事作孟浩然詩一首

吾評孟浩然雅意作詩人死經四百載賦詩名愈新爵
祿豈不賞不義寧賤貧身雖遭放還未必非得仁

次韻全真所感

淡交異甘醴雲雨相覆翻二者固殊歟終當戒多言所
遇既混叢所防難每存懷哉古之人閉門或踰垣

宿汪山之福田院

前身雲水僧今世山林士遊方未能遍行脚方自此朝
行或官程夜宿必野寺我自幽有期人言癡了事

聞潘衡有婢出適安福傳其法造墨甚精孫溫
叟捧檄其縣詩從乞之

如聞墨潘氏一派傳婢子世上多徇名我曹寧貴耳公
其品題之為我致愆凡定知青出藍未信橘為枳升堂
與入室亦喻接花理又如淮王仙鷄犬悉飛逝况茲薪

水供得法信有是我書初不工為詩長費紙筆墨倘精
妙尚可今予起誓將掃竈煤頻頻燒寒葦度日有不煩
掃煤復何自公聞應大笑士窮乃如此非但我有求知
名渠自爾

久不看鏡鬚之白者衆矣得數語寄成父兼示
兒姪

始白纔二三今白乃四五蕭蕭十數莖底用更縷數年
來悼忘悲老至作詩苦外形雖由中不應遽如許歎息

計此身幾何不埋土而此尚低回悄悄受羣侮弟能教
兒書兒足事吾國吾豈不可歸茲為寄門戶

用前韻寄明叔

鬚白底用悲我十君二五亦莫問此身寒暑堪幾數別
君春已夏往往疏勞苦况說買江天重聽誦詩許君德
故有基層臺繇累土不問鵲鴉詩猶謂民或侮如我乃
宜歸舍農即為圃永與世俗辭君來當勿戶

曉晴

金定四庫全書
卷三
蓬窻昧陰晴布衾寒氣穿起視天正霜壁月儼似懸空
濛十日雨水天湛相連氛翳一洗去舊觀還山川

冬晴三首

冰雪四十日朝光開曉霜短褐忘藍縷茅檐失荒涼
緬思江南梅安得置汝傍明朝儻更晴一葦聊可杭

吾家章泉村有竹數十百平時愛不伐雪後多摧折江
東絕近書未省有無雪頗復念此君誰歟撫霜節

我家讀書堂堂下才幾席常年曝背地兄弟魚子姪長

者坐藜床稚者把書帙此段不可忘何時復能集

斯遠生曰

下湖有隱人卜築自厥先官曾駕高車屋乃無修椽究
觀諸郎貧固知大夫賢贏雖乏黃金家故餘青氈其李
我與遊於今幾何年丈得南澗賞經從晦翁傳味有陸
子同譽由吾輩宣其人可知已忤俗何病焉今逢初度
日為頌初度篇君非黃叔度殆似元魯山見之意輒消
坐久歸忘旋是資薰陶益能使鄙吝捐冲風足披挹好

金方口居全言 卷三
句寧引牽況復兩玉兒共嬉郎罷前潛魚必求深鳴鶴
終聞天君當茂明德食菊仍佩荃我亦願黃髮挹袂仍
拍肩濯足冰水流振衣懷玉巔世苟混氛濁神其歆吉
蠲我老不足道君乎斯勉旃

歐陽全真生曰

舊聞新喻學面勢如眉州宜有妙人物舉世讓一頭君
於文忠公譜牒明派流當時山公啟有言曾未離在今
人與門推君兩俱優分教固罔外首善乃所由南風屬

初度杯酒相獻酬願君雲間鷓鴣聽我江上鷗

題鄭季奕火閣

朝來日當窻晚矣猶未落梅開怪璀璨信是日初薄勿
云文席地可詠亦可酌歲月與情懷寧須問今昨

養源齋

江源初濫觴其末千萬里婆娑數畝陰歲月拱把爾士
之於為學豈得獨異彼歸然九層臺亦自杯土累平生
養源齋曾詩與王記二公死何年夫子蓋老矣向來之

滔滔今乃見涯涘木殖歲云秋實落材則美

本齋

王子母之弟徐子父之友徐學自贛翁王則因病叟避
目鄉閭中孰若二士秀為汝名本齋乞言置汝右如病
資藥石如饑待糧糗嗟余亦老矣門戶百年舊躬耕貧
無田為圃聖所陋家携一束書勉汝期曰懋

虛白

陳君作齋舍謚之以虛白惟虛白故生此義無二說人

言莊周愚我愛莊周達東坡老仙翁出語世津樵亦嘗
為虛白是乃道所集莊蘇一等人夫子蓋三益惟虛定
何虛而室又何室是取此蘧廬而謂無一物鑑明塵垢
去水靜鬚眉出是中可觀妙無但充遊息何當過夫君
相與以終日賓主兩嗒焉不言而目擊

二十六日與公擇步松嶺而返

青山招我來松風送我去白髮頻脫幘足適欲忘屢春
初更和悅我亦除疾痼莫作倥傯歸茲遊已成屢

轎上聞簷菊香

曾聞簷菊林自是佛世界何許郁若風飄飄能自在不
然山之靈作意現奇怪於此證香嚴通達蓋亡礙

十有二月二日晚同向景先聞江船忽雨作從
教授假蓋繼以詩來次韻

誰令類癡兒乃是妨曰假君方遡歸鴻我政專野馬成
詩忽能送有酒胡不瀉此段亦可傳誰與妙揮灑

挽胡澹菴二首

憶昔樂全公暮為老蘇表載其辨姦論此老一生了滄
菴夫何如書有斬檜草顧豈無他歟言大可畧小
昔我曾大夫嘗作春陵適時惟蕭子荆袖書實見客公
經本蕭自於義豈秦越三年期掃門竟欠今生識

簡彥博審知

朝昏困薪水寒暑念裘葛度日少復佳此歲又已卒崎
嶇向行旅蹭蹬遭羈繫故人肯留連客况免羞澀陰天
苦錯莫梅事去飄忽要尋幽遐地共作頽臽集徐陵峻

詩壇王衍深理窟我獨媿其家徒窮賴如壹

用招明叔之韻簡胡兄仲威并屬明叔

一白不盡茶妙試在茗粥相馬不舉肥幹也更畫肉士
當何如觀一語可以卜我生嗜朋友有餘補不足要求
棟梁具必問澗與谷瑟兮木希聲何能娛世俗陳君於
為文筆力見往復劇稱南郡胡曰此吾類族興籃昨過
之懷刺今來辱談間不須臾未暇問以目陳君有江閣
曠瞻不遺粟非如昧者徒白晝迷麥菽何當約夫君載

酒擲杞菊我記不足云渠詩當細讀

泊舟叫巖入法林院訪洪駒父留題

溪邊遵微徑林下陟荒級逢僧衣藍纓對面日曛黑堂
空若無人巖淺僅容席流傳昔聞詩求訪今罔獲

次韻斯遠三十日見寄

窻明內晴景書味真雋永長年悔遠遊紛蠹几莫整子
猷調固疏竹可一日無看渠姿爾瘦瘦而何用腴因茲
想風度朝夕如相晤豈不欲就之身羈未能去詩來政

此時好處無涯圻吟哦不自己亭午豎雞啼

次韻在伯送行

白石何鑿鑿白鳥何鶴鶴吾行甚悠悠物境自廓廓緬
思友生良頓使懷抱惡別辭固丁寧醒矣轉寂寞近猶
已欄檻遠乃失城廓重惟始相遇夫豈世所樂逮今信
素交是果天所酢相期振古風相與務天爵興時山水
憑意或風月託君亭足鷗鷺我砌下鳥鵲詩盟寄閒嬉
筆勢異強弱君詩似陳黃君字如張索悠然正前瞻渺

矣已後落譬猶層臺登亦類中流泊憐我狂而疏誨我
詳不畧是行亦流轉敢謂逃束縛移官儻可歸故免聽
鄰析閑員苟得去自此投遠壑要期終身遊豈但今日
約吾曹念元賓學子慕有若至味匪鹽梅至樂非管籥
四三分喜怒非是論今昨擾擾與膠休休仍莫莫

奉思斯遠兄成詩以寄

叢叢庭前萱葉簷外蕉何曾百憂釋但覺中心焦故
人在何許山川極吳楚大江湧奔騰重湖互吞吐別來

書不至更望詩能寄相從志若何相去有如此普天仰
何大一已俯何隘胡為自羅網無事忽投械憑高政悠
悠思遠忽不收歸來重有感立壁成幽幽螢叢暗已歛
蕉葉抽未展百憂攻余心舐筆空喁噉

以予與斯遠倡酬詩一卷寄錢伯同運使郎中
二首

公作廣信收我為辰陽掾長沙趣歸程臨汝甫再見我
今華嶽祠公乘江東傳雖能遞尺書未易重會面錢晁

固世親貴賤寧異眷復此候寒溫因之致詩卷

我家懷玉居蓋自南渡初元無五畝宅僅保一束書不
調如釋之何翅十年餘但有四壁在倦遊亦相如况此
方病臥何繇瞻使車所徯公頻笑以為民慘舒

次韻王照隣去秋送行併呈滕彥真

風人伐木歌詠寫求友聲亦有眷令賦月邁而日征平

時朝夕居一旦離合情何以著此情賦詩兼軸盈

蕃湖
南之

歸送行詩
凡二卷

怪來擔肩重忘去破橐輕時時一披展絕勝

五色盲今日復何日霜檐曉爭明青天盡開露如見
心目誠鄙夫獨何為似覺幽憂撓緬懷平生遊多留
定王城晨出湘霧濕夕歸湘浪平王滕唱酬詩我亦
濫一名別之今幾何秋枯復春榮素書渺不來嘆我
無魚烹要賡舊貽詩餽飮仍經營定知他年見不復
刮目驚檐前坐久如四體醺欲醒夢作扁舟去湘西
尋舊盟曾微白首哀但作青眼橫山鳥何自鳴欠伸
巾尚傾

次韻酬吳德夫去秋送行之作

湘西一盃酒渺渺紅葉換江東千里雲落落黃犬歎人
生七十稀百里九十半初期枉車馬近廼遺札翰小遲
君不肯一出我豈憚雖微辨難忝豈乏具薪炭古風久
不作我友當力讚舊詩况瓊玖觸目屢璀璨中馨稱蘭
佩外飾匪玉冠初年已飛騰中道翻歎惋恐遺知己羞
遂許獨力斷於茲樹風聲何止評月旦君如渥洼種可
以羈繫絆我異淇園姿猶晞歲時貴君乎甚英爽我也

終浪漫自應殊顯晦寧復待剖判湖山冰玉明樓閣丹
青煥叩舷或乘舟曳杖或登岸君行定有得我去何可
悞與想悠然時卻憶蒼然觀

次韻和答周伯壽送行

秋月日以明秋風日以清秋今且云暮而我適東征雖
云別寓邦且復遵故程久結山水念況闕朋友情惟昔
未識初聞風已先傾一見辱與交再焉許同盟吾徒務
切磋俗士資飛鳴我事太鹵莽君為久專精我行政依

劉君言將入衡要期一見重可使萬戶輕春風一轉首
南山各歸耕君亦竟閉戶坐閱水火爭臨分枉題贈至
味如太羹此意可虛辱不然詎為榮去去復去去行行
重行行

次韻沈司法送行

坐上着孟嘉不問知小異豈其眉睫殊儻或偶相值余
生慕名流得見忘履屐雅聞東嘉州儒服類洙泗於今
師友間授受由原委沈君蓋其徒徃徃無不肄鄉雖未

云識早已知名字胡為冠惠文更復倉庫吏人之不相
知擊磬與荷蕢至其移怒時水蟹或遭忌人誰不君知
相與共愕眙君方繁官曹我乃赴幽事別語縱可佳離
愁渺無地

次韻潘端叔送行二首

君公隱牛僧文休食馬磨身則因空乏道為如切磋昧
者不知此輕受鄭灼唾遑乎欲奚為况覓陽春和余惟
素賤貧學晚仍廢惰念將求歲餘要必取日課向來四

方遊不辨一室坐已深
蕪穢遭更值雪霜挫茲行
自棲遲詎得嗟轍軻固殊
南山歸敢曰東山卧胡為
論知仁

乃復稱同過我無歸去辭
君有歸來此

仁過之語南紀之論也

君言不為詩乃有如許味
詩亦何與人政恐傷吾氣
中懷松栢堅外暴丹艧堅
君雖不我語我亦長自畏
不惟費口頰政爾悲腸胃
良由習未除匪是真為貴
君言固

鄒魯君筆猶漢魏絕倒豈
自文善謔非加詐贈言要
有益佩服當無既勝私與
致果曰克仍曰毅曾聞鄭
渠鑿

終有秦畝溉閭閻望其成悠悠勿虛費

次韻劉先生送行并令諸友及子侄同賦

斗食綴散吏幽棲還故山平生讀書志欠此歷年閑馬
倦政長路驚饑方淺彎吾師與吾友高處若為攀

呈趙常德四首

東南米最賤舊說湖南北及今身見之價豈下江國此
行為米來對此增歎息人謂使君賢寧慮有失職

朝廷不忘遠徒欲得公重不然如公賢久合居侍從少

須歲和豐歸騎承天寵看取武陵原田耕麥米壘
豐年易為政凶年易為德政本拙催科德乃足民食蠶
豹忠信行田里愁歎息德政祇如斯何用求赫赫
將身付銓選乃奉蠻府檄蠻語初未學嶮絕聞人說進
前退不可信有難如棘所賴使君賢餘波能普及

呈游子明二首

安仁山水縣令君文章伯林深蘭自吐川媚珠所宅絃
歌導斯民傳舍闌過客口雖絕雌黃眼顧分青白

頻乘信州船屢泊雲錦驛登臨有勝絕偃蹇費收拾
君名能詩公事多暇日儻可付篇章大勝資粟帛

呈段元衡

君從桂林來我欲衡陽去邂逅一尊同飄流數年叙我
未長沙去君復衡陽來還思數年隔更遣五言裁我歸
玉溪傍君向靈山側來往方自茲飄流勿多惜

呈賈新之魚簡謝子暢

擁衾困朝醒著帽從宿諾我家附東溪君住窮北郭俱

悲壹無錢獨媿喜好學詩聲漫天壤頭白尚止壑去鄉
今幾年未路得其託相望固非遠相見每不數所思聞
清談何意發狂藥

呈程可久

微風送落日餘霞雜停雲陟彼山之巔誰識我與君彭
蠡咫尺見匡廬毫髮分波瀾似吳淞岡嶽殊勝雲是間
豈無詩愧我初不文圖畫亦足寫摩詰居離羣裴回竟
何得指點徒加勤回憩僧所廬幽閒令人欣談鋒壯麈

戰茗椀頻策勲交游數伯厚文字從右軍

君與王性之
新仲為文字遊

我是漫瞳若莫能窺厥垠沙馬復來過凜然落衣帽江山

恍疑非林空月紛紛旁有博士湖姓名未前聞何年隱君

子高樓辭世氛得非羊裘漁當是植杖耘至今宴息地離

離幽草薰人生七十稀過眼俱蟲蟻適意何必多悠悠幾

朝曛君明履霜畦我正坐水漬會合且不常使我生憂懂

何當十日款誦說心為醺庶如逢豫章其藁一以焚

呈壽岡先生

我行上蕭灘慘澹無與適肩輿問何詣揚雄一區宅地
雖占城隅野澹遠修碧主人誰何輩蓋代大章伯喜我
過其廬倒屣相應接似聞杜陵翁一飯無俗客如何重
留我更道雞黍窄談間雖文字往往先名節我語固多
狂公亦不我折為言古今人耽詩信癡絕身名兩棄置
死若墮霜葉公言蓋有激我亦因啟發莫將夢中事重
對癡人說此語竟云何梵志翻著屐

次韻元衡送別

老馬千里志老鶴萬里心
武夫用清廟珍材卧中林
進寸輒退尺枉尺寧直尋
桃李本無言山水乃有音
靡不競盛麗疇能聽幽深
平生文字遊幾作南北襟
清宵寄明月遠望傷遙岑
悠悠歸計晚卒卒年事侵
狗監薦相如將軍知杜欽
彼哉竟何處已矣真難任
乖離歎每昔邂逅期豈今
贈別枉古調和之徒苦吟
我何一錢直君自抵千金

留別成父弟以貧賤親戚離為韻五首

秋日苦易暗秋宵苦難晨蟲號雞不已我亦長吟呻哀
哉念何深出處累一負在家庸可忍行旅計愁人
今年歲大熟穀價率以賤富家積囤倉負自無飽飯悲
哉五斗圖去矣千里遠四民士為先今乃媿工販
木落山有骨水落河有津扁舟所常經大半迹已陳身
非鴻鵠舉心乃鷗鷺親勝處自屬我塵事勿敗人
我家如陶舍幼稚有盈室汝家亦十口持去何可得嗟
我寡兄弟至此得無戚雖爾敢或忘啍濡期沫濕

人事苦好非咫尺當語離及乎中年後畏與親友辭陶
謝得道者其言且如斯況我乃畸人嗚呼得無悲

淳熙稿卷三

欽定四庫全書

淳熙稿卷四

宋 趙蕃 撰

五言古詩

詠古

按陶淵明傳為彭澤令在縣公田悉令種秫
曰令吾常醉於酒足矣妻子固請種杭廼使
二頃五十畝種秫五十畝種杭淵明為令在

晉安帝義熙元年乙巳是年三月淵明猶為
建威叅軍仲秋到彭澤在官八十餘日又傳
解印去縣廼賦歸去來本集亦云十一月也
則淵明去官當在十月而賦歸去來在十一
月耳仲秋到縣非下種時杭秫之語豈舉按
間戲語耶因賦詩以紀之

淵明欲弦歌為酒利公田到縣十餘日歸意已拳然一
稔且莫待遥遥問歸船是事可質信考之歸來篇種杭

與種秫夢語落何邊

和陶淵明乞食詩一首

并序

自八月來日以抱衣易米為事衣且竭矣米
卒亡術可繼因讀東坡和陶乞食詩有幸有
餘薪米之句則知坡之貧蓋不至於陶而陶
雖貧猶有可乞食之家僕今縱欲乞食將安
之耶輒亦次韻

我生墮貧中欲避將安之去年未是貧假貸猶有辭親

朋戒今年相與謝往來朝昏曷以度半菽藜羹懷大笑
不知悔且和淵明詩兒曹相與語我幸乏此才聊為一
飽謀餓死無自貽

和陶淵明已酉歲九日詩一首并序

立冬十日矣所至菊皆開今日讀東坡和陶
詩有十月初吉菊花始開與客作重九因次
韻陶淵明已酉歲九月九日詩一首輒亦次
韻

山中無厯日不知冬已交起行視林園草木如半凋黃
花獨何為亭亭有餘高俯不媿轉蓬仰何羨凌霄當其
雜衆芳開落真謾勞豈若稍退步坐閱枯與焦建中方

死蘇元嘉廼終陶二老蓋歸然所歷匪一朝

淵明元嘉四年卒

六十有三坡建中靖國元年卒年六十有六

重九纔四日爾風雨如此病卧殊亡聊小兒輩

取酒飲予且索作詩強和淵明九日閒居一首

久不觀陶詩彷彿如前生忽此迫重九意是渠所名我

方卧病中齊居忘昏明不知簷雨落但覺奔濤聲兩兒
絕可憐弱者纔五齡深憫乃翁憊取酒前為傾歲月已
如許我衰難復榮但願此可安閭里無異情何必議徙
居終焉計將成

九日用靖節已酉歲韻

宿雨曉未止紛紛雲氣交秋令迫淒厲草木無多凋去
年當茲晨採菊踰山高晚上寶公塔徘徊意干霄今年
此幽居粗免出入勞茅簷縱偪仄亦類蝸廬焦舊醅更

可漉幽憤斯能陶莫問無窮事人生如露朝

人愛九日多以靖節之故僕以邠老七字為可
以益其愛者且連日不雨即風尤覺此句妙處
賦詩八韻

東籬滿把菊柯山一句詩四時皆有節九日獨如斯潘
子夙所尚陶翁何敢師是故逢此日愛慕仍淒悲所願
學淵明歸去了不疑松菊儻猶存田園隨事為亦願如
邠老白首邱壑期人窮與詩長得失其在茲

拜嚴方範祠

東都重風節先生實啓之有士蓋如此不拯家國危廼
知大厦傾未易一木支我讀黨錮傳涕流每交頤往來
桐江船必拜嚴子祠俯誦宛陵句仰觀文正碑禹稷與
顏回千載同其師數公固天人可望不可追但願如玄
英隱居名能詩

讀阮嗣宗傳見其醉六十日免求昏之言與醒
忘作勸進辭據按使書何乃異同耶作阮嗣宗

詩

吾觀阮嗣宗醒醉俱托狂
廣武歎已絕蘇門嘯何長
昏既以醉免辭寧不終忘
又疑殺青上闕文今或亡
不然竹林遊何獨棄山王

論詩寄碩父五首

詩人例多窮我窮亦何因
頻年走道路一饑累其身
簞瓢豈非福天理元自均
俯仰苟不媿此心猶昔人

我詩元不佳病後日益退
年來窮到骨未可專詩罪
故

人周與施愛我不我費歲晚短書稀相望千里外
學詩如學道先須養其氣植苗無它術務在除荒穢
滔江漢流源從濫觴至要作千里行無為半途滯

東萊老先生曾作江西派平生論活法到底無窒礙
言雖可想恨不床下拜欲收一日功要出文字外

溧陽罕賢才兩沈好兄弟讀書不求功其涯未可既
古
人豈難到願我力行爾茲道果何如在此不在彼

雜詠

蘭生雜蓬蘽匪願為世採一朝落城市未免論金賣金
輕孰見多棄不待其艾杯土儻與期含薰歲猶再

鳥雀雖微物頗知庇其身育雛並庭宇用意蓋即人即
人亦何為吞噬防暮晨巢空儻不採豈曰近乎仁

婦有居冢亞冢富亞則貧貧知敬尊章富不親補紉尊
章愛貧婦富婦讒生鬪讒巧偽若真兩婦俱遭詬貧婦
自修飭富乃計之得日復鬪其間衆謂貧當出尊章賴
深慈不納富婦詞貧婦亦勿疑但瘡前所為讒言有時

辨富婦何施面貧婦貧無歸尊章願終養

令逸作歲寒知松柏題詩因作

不有歲寒時若為松栢知南方故多暖此物寧能奇漫
道同生植何云盛衰齊不臣真浪說難用空增悲匠石
今孰是明堂那覺遜玄都種桃者一笑已前期

嚴山

嚴山多嵯峨婺水爭平遠山如古屏張水似橫軸展世
絕郭熙畫我無摩詰詩熟視眼中景偃蹇不得追

春風吹桃花適與流水會流水固無心桃花亦何意如
何武陵人便至神仙家神仙不可見回首空煙霞

范湘監務許惠其父盤溪居士詩先往數語焉
國朝幾名家在蜀蘇與范斯文何與人竟作南荒竄盤
溪諸子行少小便精悍早從宜州遊句法悟骨換官稱
薄如紙名蓋越千萬我為餘杭役識子非楚產姓名問
即識一笑冰已泮長哦廼翁詩疊疊無間斷使我傾耳
聽妙處驚輒歎前輩今遠矣俗眼易作玩大軸許見遺

此賜安敢慢行囊政爾空得此吾無患

二十七日作

卜居面勢隘附山枕林麓曠瞻既無地何以慰羈束昏
昏半月雨候應黃梅熟晨興更涼冷轉午增蒸溽山蟬
苦見聒聲亂非絲竹病夫不耐事頗復傷煩促緬懷江
湖舊歷歷夢能續誰與具扁舟我被立可櫂

桃花臺下望龜峯作僕為信人而未歷此山懷

玉最近亦所未遊因賦此詩併自訟云

吾州四名禪

謂鵝湖靈鷲
懷玉及此爾

獨未歷龜玉足後懶不鞭幾

同毀於積繁舟桃花下龜峯正相峙決意欲造前已行

卒成止嘗觀是山圖未究所得名道人相指似咸曰因

賦形方今聖人治圖書當瑞出胡不負之去而此又屹

立老我無藉在放意師莊蒙不願智以用懷哉曳塗中

期斯遠不至登谿亭有懷併屬雲臺劉先生三

首

落日照谿谷寒光搖樹林宿鳥投密枝歸雲釋遙岑餘

輝尚煥背纖月忽在襟可人期不來何以寫我心近者
且若此悠悠望西南

西南定何方路遠惟迢迢白鷺帶演迤青居鬱宮堯下
有隱君子內盛外不驕芳春覺蘭馨窮冬知木喬無為
事獨往車乘方翹翹

戚戚重戚戚有抱不自釋問余何所憂學道不早力悠
悠復悠悠頭禿領頽白先聖有遺言朝聞死可夕矢詩
道其懷庶獲師友益

二月二日阻風呈同行

平居說江湖似若苦饑渴及今落吾手謂可娛朝夕胡
為連日行廼復形歎息使風不終朝阻風有併日欲行
波濤恐欲住饑餒迫吾舟僅如芥吾命真若髮吾罪不
足云吾家復何說不唯風浩蕩更直雨騷屑鷄啼三家
幽鳥度萬里濶遙聞君山青舊詠高樓月何當俱醉倒
夢去山南北

與彥博審知同為問梅之行到溪南僕與審知

俱以畏風罷興止小酌于僧房以有寒疾不可
以風分韻作詩得有寒可字三首

驚飈振林梢落日掛馬首世方功名圖我自饑寒走蕭
條政長路驩喜逢故友酒酌戒毋多詩聲媿新有
非為十日留重此一歲闌歲去易悲感日來盛陰寒今
晨已春意欲出反浩歎梅事足可惜病軀良獨難
山梅且翩翩溪柳向婀娜羣行欲何詣僧屋惟所可連
朝謾靳爾作意終敗我此事且復然吾生信多坷

五月十有八夜與審知同宿塔山次審知韻

初期半山來已止輒復上山遊更同君兼取魚熊掌向
來觀極南屢作此山想那知有今日談笑得縱賞謝公
彼何人詩聲擅霄壤得非山川行於以助其長逐人易
浮沈與物多俯仰政當恨未立安曰悟已往蕭蕭煙雲
變浩浩風雨響世豈乏此觀身由居蒼莽

再次韻

偶來無一闕何必化身上下視膠擾中脫去如覆掌我

生本山人說山非妄想賦詩亦漫興不要世稱賞與君
志同趣匪但居同壤惟慚學不進莫稱年事長今人豈
無賢敢謂吾安仰不爾簡與編言行富前往相期山中
讀勿待秋風響而我累饑軀畏途方莽莽

雨宿永源寺

六月有此雨是為豐年徵我眠虛堂上肅肅若有冰預
愁前溪水明發度凌兢

十二日登列岫亭有設空幄者去之薦福酌淺

沙泉登大梵之秋屏閣而歸賦詩一首

軒亭著難穩名字又惡同譬猶死得謚美惡百代公維
洪之厭原茲為衆山雄何許千萬間可以屏障充不於
春夏時刻畫仍遺冬豈非即其西故取搖落中所得正
且盡評自曾南豐是令登賦士談說口不容我留豫章
城十日雨且風重尋湖上宅再叩仙佛宮未行北沙門
憂心實忡忡落日擬進棹殷勤謝篙工我遊有未盡汝
去何匆匆肩輿天寧寺高下一逕通其誰列翠幕正爾

遮青松欲住不得久傍觀南平鐘清澄淺沙泉一酌醒
我宵秋屏適跬步直上如凌空回觀列岫亭有見真附
庸玄暉彈凡句固足名壤穹後人竟攘取榜識千家逢
況茲如許山詎止憲戶供脊記題徠真疑未經此翁亭

脊記乃折
仲古重建

孟秋八日夜伯壽仲理過予同訪俊又步月入
城南書院繇東渚上讀書堂過蒙軒憩卷雲欲
訪月榭而月未到坐濯清者久之乃歸賦詩十

四韻以記

昨夕城南來鬱鬱張園窺坡頭步犂确墻下循委蛇今
夕復何夕二妙爰集茲重為南坡行因作張園之無風
幽自涼有月光仍滋菱苒與草樹陸離間參差卷雲一
舉趾濯清久支頤空無十丈蓮湛此數頃池堤柳有倒
影畫手不可施愛之不能已遂許他夕期昔人安在哉
萬里鯨魚騎神游儻來歟恍惚不可知林園想巾履編
簡遺書詩懷人渺無盡樂處翻成悲

克齋

百川恣奔騰底柱乃屹立萬物蓋可流疇能轉金石世
紛爭嶭來何啻一敵國油然反吾齋夢覺春水釋

題鄭氏北墅

藍輿度浮梁朝嵐尚濛濛十有九日雨得晴類投空遊
巖既願適訪隱亦好從道傍得野舍一逕幽且通主人
誰與者其祖鄭七松流風被雲仍真有隱者風問年七
十餘曳履不扶筇我年僅其半而已衰龍鍾豈其養生

效殆自起死功若人種藝法橐駝安取同木老德亦熟
聞之蘇長公

題彥真天開圖畫

湘山不為高湘水未為遠湘城幾何家湘景無不輓滕
侯宅雖早郭園市之晚紆餘直陂陀突兀對偃蹇登臨
適正畫亭榭愜深穩詩材浩無窮畫手羞用本雖然候
變化正以發闕蘊

餘干游昌國寺

寺舊名
思碑

於越之為游束髮迄中年契闊固多矣夢寐如喚焉邇
來數經過所休必思禪凭欄上清音解包留煮泉摩杪
壁間詩幾人獲流傳歐吟廬山高坡詠西湖全惜哉此
奇勝乃不遭兩賢何當覓扁舟窮老依雲煙脫屣塵垢
外岸中鷗鷺前

學佛者祖遷自南陵來謁莫萬安題詩于知津
閣適同莫過而見之用韻以贈

嘗聞學苦空世事應廢閣頗疑休已輦顧以詩流落爾

今定何業更慕揚州鶴願長歲寒柯勿矜春濯濯

獨過知津閣二首

憶昔正月五淵明遊斜川我亦屏百事來茲並欄干雖
無與俱人鷗鷺翻以翮吾生後淵明此心兩悠然
憶昔孟東野作尉悲龍鍾有詩即景賦大吏怒不容我
癡坐移官避事得養慵寄語鷗鷺輩勿驚足音楚

題沅陵縣治廊軒

昔我過此屋四壁蔽莫窺屋外何所有榛草連污池今

我重來過壁去簷竹垂榛草既除屏沔池出漣漪簷前
復何有江上山參差山窮望不窮所恨眼力遺主人要
命名名汎境不隨昔聞今則廓曰廓咸謂宜慨茲一室
爾繫在治不治除昏與致明可不念已為游焉且息焉
舍斯復何斯豈惟君是規我亦因得師

胖軒

陶翁避暑者容膝取易安賈生憂世悲晚乃悟達觀出
處等蘧廬可作異致看胸中極空洞流止亦鯢盤

與潘文叔遊衡岳四首

欲行雨如蓀既出雲若涌山高一身微風動萬國洵豈
唯林木悲亦為毛髮悚衆謂當亟回吾行使曾勇

遠看雲吐吞近見日出沒解駁謂須臾迷漫翻倏忽山
靈似知我老興不得發縱使盡高深安能造剜剝

寥寥兩石門此地忽在眼臨欄塞雲霧入戶欠編簡規
模自我友恨不同叩款仙佛匪吾徒茲焉聊可館

常聞祝融峯今日上封寺雖孤登望眼要逐幽遐志蓋

渠目力及皆我脚力自是可將無同吾言亦聊戲

次韻衡州先生游花光因泛舟過向園示坐客

之作

使君有佳招宿雨曉更驚晨起候天色對岸煙嵐生使
君匪遨遊因行問農忙農忙趨急務歡然慰中情天公
亦喜事為辨終日晴喚酒屢酌客往往顏半頰興乘不
暇止遂作浮舟行園荒久闕閑誰復相逢迎但餘古梅
花點綴莓苔輕想其種時時老大繇孩嬰中筵出高唱

妙絕五言城勇起欲強和媿此淫哇聲

衡山道中懷清江舊遊寄長沙諸公

昔我官白下屢到清江上清江衆君子我友或我丈至
今過其邦眷戀若鄉黨幾思結廬居風流共來往奈何
懷玉山挽我不我放去年五溪歸泊家長沙國長沙今

洙泗不但談賈屈梁吳兄弟游兩周新舊識

謂仁伯德夫兄弟允

升伯

咸能不我鄙更復成我益其餘或一見徃徃情如

昔

謂鄭仲理諸公

自疑長沙人宛類清江時官期縱卒卒行計

猶遲遲出門即風雪
悵此將安之然薪旋燒酒借筆追
索詩詩成何所屬興落古湘西

發潭州

人言天宇澄政好行遠道秋陽既已後朔風尚茲早
那知羈旅臣寧有佳懷抱驚田就遠宦廩薄不得飽故鄉
雖難歸萬里生且老及今翻滯留悠邈不能到客中更
作客此意將誰告妻兒重相別更語各善保蒼鳴幽砌
苔馬鬣荒原草深羨田中人春禾復園藁

頃在杭叔驥以離湖日見懷詩相遺舟中無事
取而次韻兼呈同舟到衢當示叔驥及其兄法曹
江南千萬山何許為吾栖深林與豐草本自麋鹿宜長
安冠蓋場誰識杜拾遺日赴鄭老飯未救方朔饑如我
何如人飄然亦天涯買舟今日歸已恨作計遲山川舊
曾經所至皆依依共載得王蔡何樂其如之但恨詩豪
人先我浮春溪眼中清絕處收拾隨以西遂令我筆端
失去溫潤姿衢州法曹君句成亦多奇會當一快讀遣

此別後思人生離合間可喜更可悲但泛石室酒萬事
端能齊

溧水道中回寄子肅玉汝并屬李晦庵八首

出門復入門去來何悠悠故人別有見見乃不重留居
人寧念此行者可勝不

今年非閏年是月已臘月北風勿渠嗔汝自衣百結永
夜只愁陰清晨吹作雪

僧房四立壁浙瀝夜吹風破衲作深擁其勢乃若空晨

鐘不能待宿火撥通紅

悲風吹籃輿渺渺如孤舟我亦作坐睡兀兀隨輕鷗鷗
翻夢亦覺未絕叩舷謳

抱關故悠悠掛壁仍駸駸況此十日病酒止詩廢吟別
來定安否千萬關我心

借宅亦種竹知子未忘此竹間有餘暇塵事勿到耳行
年且半百太息我與爾

懷綬新枯州乘驄前御史一州與天下先後寧同軌縱

云山水佳何與於瘡痛

李孫兩詞伯我爾乃學子輩行雖不同趣操要相似歲寒松柏知春風謝桃李

自溧陽達上塘官河舟屢行矣不能盡名其所
經偶書小韻

平生溧陽船白首凡幾遭宜其登覽地靡復應接勞吳
流亂如帶吳岫兀若毛吳人闕共載吳語聞空嘈雖云
面目熟竟爾名字逃冬常置雨雪春復衝波濤茲行又

累日逆風苦悲號曾微咫尺帆頗費千萬篙一以付累
句再馬茲薄醪詩書陶靖節相馬九方皋

貴溪出陸

捨舟覓籃輿意欲避搜句那知花草香不減江山助霏
霏霧將歛兀兀村又度長卿故倦游征夫問前路歸歟
亦何為時哉正農務

二十三日雨中發贛州

江流何湯湯萬里勢方注僮奴勸東舟期至纔旦莫我

聞是江石屹立甚可怖水乾或能避水漲多與忤卒行
偶相櫻取死將誰訴況我坎坷人快意天所怒遲速均
一歸可犯馮河懼吾寧事崎嶇依舊來時路梅月況何
常無庸慮朝雨

再宿合龍山

山僧雖居山山豈山僧有政如多藏家黃金為誰守我
雖不居山隨至輒有取未嗤無田人飯薄亦昏晝生平
所經歷勝處十八九要當考於詩未易談諸口合龍近

始至游訪茲亦偶愛其四回合中乃開戶牖欣然遂留
宿日早未及西壁間右丞句歲月蔽塵垢摩挲追和之
武夫繼瓊玖及今再來過如客還舊畝往泉但涓涓今
作雷音吼往筍尚戢戢今已長過母長夏當更佳我住
不得久遶竹聽泉鳴悠然屢搔首

桃川山中用陳蘇舊韻示周遊

仙人之為仙終古莫盡世頗笑區中人
汙汙逐川逝念將與之游端恐吾道廢
如為千里行數步輒一憇不如

返吾鄉耕鑿仍樹藝及私具伏臘輸王應租稅人惟顏
徒晞學匪桀犬吠桃源定何許說自淵明製今日復何
日身乃中山詣嗟哉彼羸秦其虐甚幽厲不知喪無日
萬欲從始歲商山被褐者疾疾由德慧徐福尚海山此
地只楚界胡為畧不聞政坐耳目蔽神仙非吾學可以
置度外山高水深深好事幽尋拜

與成父弟自嚴礪同入城晚宿黃巖

昔人重離合感慨思功名我今迫貧賤乃作分袂驚排

徊未能別崎嶇復同行捫蘿到黃巖倚杖日已傾摩挲
磴道古開拓憲戶明道人慣看客撥火治短檠村醪偶
提攜霜柑亦包并病來不喜飲一再瀉濁清道塗今日
勞林壑他年盟蘇州對牀卧不下五言城自經長少公
增重手足情細聽松竹響疑是風雨鳴披衣更起坐月
出山四更

過愛直驛次張安國韻

亭然一何奇枯者亦靡側雖經歲祀多未覺霜霰迫余

行再此驛爾故無變色慨念題詩人深為九泉客泥深
兀羸馬苔老迷舊刻愛爾故蒼蒼余今變為白

承契兄昨過我於永豐山間今又相遇於鄱陽
以暇日同遊薦福寺會軒蓋鼎來避之天慶觀
作詩一首

君為日邊行過我迂道里我有江上役值君亦行李誰
云動參商邂逅乃如此似非人力為定是天所使古云
昔道場門枕東湖水相從及休日趨去不停軌叅禪固

未暇作詩實先議要問戴叔倫當年卜居意

寺前之堤名戴堤乃

叔倫
舊宅

發衡州後懷使君劉先生

四年別師門十日留函丈所問與所知安得回賜放
孰為驅之去茲行定馬往倦馬苦陂陀白鷗思渺莽

閏七月二十日侍知府寺簿先生為石鼓山向
園之遊

晦翁守南康政成有餘暇駕言山之中於日非聊假紫

霄作重陽白鹿見圖畫聞之幾向風恨不款段跨今年
五溪歸適日三湘役先生喜其至舍以江亭閣頒能枉
高軒人駭非重客那知先生意於此自為德茲日復何
日休沐著甲令先生重過之俱款石鼓勝西溪命題字
東巖俾開徑既除古莓苔又索賢名姓已焉興未休棹
舟放中流西風未却暑一雨方回秋僧坊遠莫至隱墅
近得留寧同峴山輩不異舞雩遊

蕃方為紀遊之詩未就知府寺簿先生寵示佳

句散輒次韻

茲因謀道來不為看山新看山雖云新圖畫猶昔人虛
亭十日留欲出凡幾巡隔江樹差差俯檻波粼粼終藉
席間語乃滌胸中塵况茲籃輿行攀崖陟嶙峋是知竹
使符不異邱壑身世人何不察百偽嫌一真而我孤拙
者崎嶇聿其輶話言聽矻矻書札勝頻頻先生今徐州
愚非歐陽陳庶因唱酬詩牽聯詔無泯

仙巖道間

茲巖如許深中乃一物無非仙莫能幻故即巖之呼何
代有禪衲于焉寄褐蒲名字不可考種松今欲枯我來
值雪後陰崖盡成晡茶罷攝衣起巾車問前途前岡雲
氣敷後嶺雨脚暗宵安禮賢枕蚤赴天心飯薺馳亦云
極憩息寧卹斃自猶厭登車况乃躬負擔行年甫三十
道里遍千萬懷哉坐一饑使我歷諸患長卿病故多次
山仕真漫盍整舊詩書歸歟老山澗

題新藥鋪鋪在灘頭

朝煙山濛濛暮靄山冪冪窮日作山行而不見山色投
昏宿此舍乞曉動前轍歸夢遶家山灘頭有輕櫂

夜泊劉口雨連明有懷成父

山中風雨夕招要對床期今夕風亦雨牢落孤舟維蓬
窻與竹窻蕭瑟雨在茲不寐欲至曙何繇夢見之

重九前一日東流道中

明日乃重九今晨更天涯馬嘶原上草菊放崖邊花吾
家白雲合歸路青嶂賒去去無復道行行空自嗟

意釣

仲舒區中賢談治苦吃吃但知羨川魚不慮網罟密仁
哉東坡公遊戲亦此術究其廣大心意釣真玩物我欲
竊其語作廬以自逸東西南北人有志特未必相會有
溪竹竹下亭可立亭成乞以名四海一明月

半江遇風濤其勢危甚晚示同舟

言歸固多欣值險輒大怖方趨順風捷忽與莽濤遇得
非蛟龍爭無乃雷霆怒我舟僅如掌我命且如縷何止

失人色殆欲成狼顧神明力扶持生死費調護平生素
多艱安坐乃其處便哦歸來辭勿草遠遊賦同行信同
憂相唁勞相諭急反浪頭魂還尋酒中趣

十二月一日使風

中宵不得休常州已鷄鳴欲知五更寒掃霜四聞聲出
門風暴起掛席遂前征官河溝瀆耳洶洶若未平想見
太湖中白浪山嶽傾紆直雖有殊高枕幸不驚舟師尚
若悔吾身未宜輕既無性命憂從使嫌怨并

嚴州道間得順風俗云七里瀧篙師云風便纔
七里無風乃七十里爾

桐江多莽湍牽挽厭勞止舊云七里瀧實乃七十里篙
師為予言風便輒易爾迴思前日驚留滯固可喜溪神
果何心憐我倦行李有風西南來不徐亦不駛布帆保
無恙為賜何其侈眼中峯巒過天外鷗鳥起畫圖欠傳
貌詩語費驅使生平登臨心於此得自己勿歎囊橐空
收將遺妻子

淳熙稿卷四

欽定四庫全書

淳熙稿卷五

宋 趙蕃 撰

七言古詩

永豐令括蒼章君尉上蔡謝君以淳熙改元二月晦日勸農於負郭祖印院事已率蕃為汎舟之役

前村後邨桃李空牡丹酴醾當春風令君無暇問許事

親率僚吏行劭農清晨小隊東郊出宿雨初開泥尚濕
白頭扶杖稚子旁不待符移自相集令君盛服臨致言
國因肆赦新政元雍熙淳化太宗年治道度越唐漢前
爾曹何幸生此世身不知兵無橫稅去秋小歉未足云
詔書屢下憂勤意吏令奉行敢不躬爾無自惰愆爾功
吾言諄諄爾其聽酒肉更載君恩豐我時佇立觀盛舉
徑欲傭田買牛具不然枵腹亦以寬年登賤糴夫何慮
少焉有白官盍休攜我山陰上小舟謂我聊此半日留

與民同樂非宴遊

四月十二日以夏潦暴甚艤舟辰之鐵槍崖下
偶得浮木於水中宛然如山因其形似名曰卧
嶺立峯喜而賦詩當寄交友之能詩者求著語
焉

昔讀梅蘇木山詩未信人間有此奇雖云尤物不必有
時一玩之何病為吾行東南千萬里仙遊不已遂臻此
奇奇恠恠曰在眼浩浩湯湯夜盈耳舊評峽江似嚴陵

此行佳處亦可朋又聞八桂好山水亦應與此相雲仍
畫師好手不可遇詩中有畫無其具江神好事不我尤
乞與一山酬願素不知何年遭仆落浪激波衝幾飄泊
岸高壁立自巖巖泓淺切深非斧鑿老夫得之喜莫極
欲加名字相刻畫卧之成嶺立成峯天成故爾非人力
多言說說欲何如要覓新詩為寫摹余名敢與昔人並
用寄我友梅蘇徒

八月二十四日同審知登塔山用審知前載九

曰留題之韻作二首時彥博歸及常山

郊原莽莽吹黃埃餘暑已去若復來
昨宵一雨為蘇洗曉興坐覺飛崔嵬
平生詩盟有徐孺筆力可挽狂瀾回
要明兩眼費雙腳作計似我何疏哉
茲遊只欠王子在見說歸書一紙開
追隨正復聽君樂流浪如我空增哀
吾邦此山頗高絕泛菊况堪臨季月
要當相與一杯酒只恐因之又成別

出門生憎觸風埃故邀幽人山中來
小休危亭帶曲折

未盡高塔當崔嵬目營所到豈有極脚力尚壯不擬回
舊遊久闊空信耳高處一上何佳哉是山百年定誰主
一丘新壤手所開淵明自祭豈非達杜牧作誌夫何哀
如君風流固曠絕與我論交忘歲月異時訪我入此山
扣牛共唱生生別

明日同數公復登山忽聞履聲乃審知也攜和
詩三篇來復用韻作一首

松間謾設衝浮埃眾然誰能為余來憑高所歷故已下

得君更覺爭崔嵬茲山不到近十載頻日能來已再回
人生萬事每如此而欲取必真愚哉袖銜文書辱持似
快讀不待紙尾開金聲詎須擲地出隱隱自雜山風哀
吾曹用意果癡絕非爾何以娛歲月明當舉似子王子
不但慰歸仍賦別

貴溪隔岸有二巖僕舊遊也聞子暢受秋租於
彼以詩寄之

黃巖嶄絕人人居徐巖蟠鬱處士廬扁舟半載泊南岸

折梅看雪頻携壺黃巖夾道松百株風來迎送齊笙竽
壇崩殿古黃冠癯懸巖石刻墨可摸徐巖觸目多荒蕪
啼嘯往往紛鼪鼪廢基斷砌或有無名字不復知誰渠
聞君奉檄方受租播糠眯目莫與娛作詩為君道何如
尋幽速遣從騎驅賦成孰寄當念吾不用寒溫枉素書

次韻斯遠同宿歲寒西軒六韻

思君無計憂能舒見君還愧腹每虛知君於此未見止
而我但覺有不如他人招呼厭來集為我淹留成屢屈

豈惟高義篤交情政賴微言起衰疾南山三刹此最高
平生幾許乎逍遙異時我去君獨遨期當寄我山中謠
謁孺子祠後由南昌還艤舟之地

南昌假傳欲上書孺子乃復辭聘車東都已顛不可救
莽簣未露猶枝梧福為市卒終潛吳穉乃懸榻太守居
吁哉迹異心不殊出處語默如是夫

呈齊之二首

舍舟步到南山寺恍然忽記當年事李侯見我顏色溫

席間款語真有味翰林風月久蕪沒莫歎青衫百僚底
君不見少陵一生窮到死亦有詩能驅瘧鬼

南山清隱
寺僕兒時

嘗遊焉

夜聞袁宏誦詩聲空山寂寞魚龍驚丈夫有才不負賤
倦遊何乃困長卿平生讀書得力處公卿褐夫安重輕
鴻鵠一飛定千里俯首莫與燕雀爭

主山湖園二渡

主山渡頭成久立長年傲客呼從疾撐舟來前僅如掌

沂波却下幾百尺湖圍橋壞新有船衆壑奔流會一川
嗟我胡為數此險爭似飯餘牛背眠

約明叔過買江天閣

前年為君記江閣醉裏狂言不知作豈惟大負退之慙
要似揚雄真悔作君家此閣端何然萬里長江咫尺山
江流湛湛山平遠合付畫手非詩傳畫工縱得空諸境
閣中之人妙難領世人紛紛變蛭蛇是公了了形神影

白鷺洲詞寄曾裴甫

曾時在鄂

白鷺洲前烟草微黃鶴樓外烟雲飛縹縹黃鶴政高舉
漾漾白鷺孤無依鶴舉直上登寥廓鷺立汀洲方俯啄
卒然驚墮野人置豈不欲飛遭急縛

示兒

我昔讀書夜達晨膏燭且盡繼以薪年來漸知得力處
簞瓢陋巷忘其貧爾曹有身須自立幸逃薪水供朝夕
不於文學自勤苦長大始悔終何益

十八日記夢

冥冥落月子規哭幽人夢成續復續茅簷壞砌到何許
醪醑架倒留紫竹紫竹新抽雨又滋淚粉娟娟凝翠玉
夢中自省非宿遊又意簷村舊林谷阿連對牀呼得醒
亦說夢作看花行看花夢向江南去江石聲確屐有聲
行逢古屋鬱崢嶸仙家釋氏俱莫名看花非揚亦非洛
但見滿眼灼灼朝霞明夢中又意東莊路普圓寺下笑
蓉樹主人亦道舊相識乃復不逢戶外屢嗟我與君無
自疑夜之所夢畫所為扁舟若具可徑歸知長不必詢

筌龜

別韓尚書

南山之作險以壯南溪之作閒以放流風莫和况當家
南澗先生堪頡頏吾州自昔寡所傳一自南渡居羣賢
邇來寂寞誰嗣焉先生築屋南山邊先生事業本廊廟
履聲夙已光明到閭廬固非避寒暑大厦萬間均覆幬
我家為庶為清門早因昭德容攀援自期松柏歲寒後
不入桃李春風園鄉者屢見不一見何但懷刺亦行卷

胡為於此不繼來衣食遑遑遊苦倦扁舟去矣江復湖
可能不一趨庭隅吹噓上天不敢望贈言於此能無乎

送徐季益赴婺州陳尚書之招并屬寄謝郡守

韓侍郎

禪月臺邊草樹蒼下臨溪流碧泱泱君卜居之歲且長
徑路不忍夷其荒我時巾幅上君堂勞君煮茶炷爐香
與談世故如有亡掉頭誦詩聲遶梁別來書劄闕寄將
忽然貽我細作行似言欲從懷玉旁迤邐遠趣金華裝

此行甚重無或傷況君袖手久退藏九十半百胡可忘
儻謂地主詢吾鄉為致登臨憶侍郎

寄新喻丞章季亨

憶昨寄聲因鮑子闕然已復四終星向來相期臺閣者
薄宦乃淹松竹廳頗願近詩見新述舊好尚意能忘形
臨風三歎不知罷梅花落盡蘭未馨

送王亢宗赴劔浦丞

青松自是山林物移植堦除傲難屈雜居簞楚塵埃地
譬似高人累簪紱孰能哦詠於其下古今僅有一斯立
昌黎老翁為之記遂使崔名等金石王郎家世本愛竹
舊說不可無一日要將我竹配渠松聊復從容寄卑秩
春風咫尺龍蛇動除地求栽政宜疾為銘耘業定誰歟
是公筆力韓之敵

李袁州嘗為君
作耘業齋銘

送程提幹

宏靖

尚書曾剖上饒符我姊亦歸高郵掾與公既親亦有故

此地經行幾相見十年幕府持旌麾日月計之無乃遲
治世急才寧定制僕公把節慰民思

送丁懷忠朝佐赴象州教授二首

西山南浦昔相逢桂林象郡今相送長才妙略世所知
諸公貴人胡不用文風廣被固可喜志士遠適宣其理
上書報罷君勿悲廣西政復多事宜

我今方從湖外歸君行重向湖外去湖南山水故佳絕
我獨茫茫畏長路君行更過五嶺南象郡我亦聞人談

縱令為郡真爾好願勿久留歸要早

留別子肅

欲雪不雪雲雨愁將行未行心口謀問胡不去良有由
故人伏枕關我憂自心初識十年遊不作世人新白頭
抱關非為辭挾搜乃知自欲吾志求適來遂作兼旬留
昔者公侯今日瘳河山空能泣楚囚不如窓几間不休
公如大道鳴騶駟我乃蹇足歷澗溝彌明故足悲侯劉
淙淙詎識東之流懷哉黃堰公先疇章泉吾亦營菟裘

莫言相望風馬牛
葦間會有延緣舟

次韻呈審知

誰去徐郎瘦如竹
撐腸書若相如粟
渠儂高處背時俗
而獨許我遊與辱
舊來詩已有老氣
邇日更覺加圓熟
我生取友固不苟
乃復得君真厭足
清朝求士正側席
可使白駒詠空谷
期君布衣應徵書
未見却從東觀讀
我今作官竟何事
亟拜未應徒鼎肉
與民憂樂安得同
所念因人終碌碌

再次韻呈審知

秋風冷然動高竹起並朝簷溫體粟忽驚剝啄意誰何
乃是和詩重拜辱再三開闔手不置不惟詩好字亦熟
我雖年事濫催忝於此論功真未足重憐別來不我舍
連日追隨訪林谷和詩未厭數還往別後要期常誦讀
知音已死或絕絃聞韶解忘三月肉但得我輩識錚錚
徒使世人譏碌碌

審知以詩送行借韻留別

十年保我章泉竹木枕布衾供易粟家貧縱爾不自給
且不知榮安取辱今年誰令起作官此路向來非所熟
示詩往往道離索又說是邦山水足風流文物夙有人
九州共識黃山谷細哦海內流傳句足緩司空城旦讀
少時已無鞍馬志老矣豈堪消髀肉但令詩與故人期
此外聲名甘碌碌

季奕枉詩送行借審知韻奉別并呈伯元

往年敵來如破竹九州泛若浮海粟鄭公仗節守馮翊

毅然可殺不可辱飄流南浮適茲里平生行事耳目熟
幾回下馬過其墳溪水洄洄抱山足季孫甚才耻為吏
哦詩欲效雲臺谷四篇贈我勞我行入手為之三過讀
君家涇縣亦工此知者尚稀凡眼肉會看入洛似機雲
不應如我但碌碌

孝顯追送至沙溪書所見以別

白雲英英行空山白鷺矯矯去復還雨聲驟來却小住
樹色全綠或半殷誰家有屋茅三間春聲未斷橫炊烟

刈禾雖阻得治圃造物所惠無一偏我亦願此坐無田
千里願上西江船經年擾子曾未厭更煩車馬相追牽
客中無酒可醉子耶書所見為別言

成父來自玉山審知有送行詩且以見及次韻
思君一夕或三起詩卷曷從來眼裏驟疑笑語接秋窻
不悟江山隔吾里近來海內詩好誰賤目可憐空貴耳
謫仙既作東山稱杜陵亦貴衡陽紙吾人得窮固其分
幽谷安能爭市倚何當與子棄茲世卜居在在佳山水

不同淵明田下課即效龜蒙耕甫里文成不作封禪詞
相我于耜并舉趾

次韻徐運使送行

歸耕負郭家無牛手持釣竿何適投長年慘慘集百憂
土牛未肯隨獼猴秋風別家月未鉤彈缺永歎客五侯
吳江楓落曾四愁行行重到江東州誰能著意憐轉流
新詩忽俾吟掉頭念將小駐蹇莫留冰霜豈不思推轡
山川回首空相繆

再次韻審知索彥博送行之文

江清可釣思持竹地廣可耕思種粟胡為作計久低回
而乃覓官親賤辱南州徐孺晚與遊江東文度昔所熟
堂堂荊州止獲一人半我邦有此二士差亦足五君流
詠轉竹林蘭亭何意慕金谷徐詩到眼以數過王筆入
手曾未讀但能贈我以規不以頌不用崇酒仍載肉嗟
哉他人豈無言交友不高徒碌碌

寄劉叔驥魚索遠齋伯端仲文叔魚叔驥和叔

太和送行詩

苔溪往來非不歎何山道場况非遠如何著脚竟無緣
孤我平生看山眼劉郎生長在溪山吸光飲綠歲月閑
不惟人作晉宋樣更覺詩叅簡遠間向來稍得相酬唱
別後闕然難屢枉况今結束事西浮那可無詩道遐想
遠齊視我猶其子伯仲視我乃其季儻能俱寄絕妙辭
更約髯叅并表弟

寄楊溥子

昔聞許劭月旦評人生倚以分重輕當時初非徇虛名
往往夷考其學行令人誰復持此柄鄉評亦復無公論
故當信目不信耳毀譽不用從人間我行潁陽得楊子
何止國士天下士大科異等非謾狂筆頭真有三萬字
十篇琅琅金玉音一唱三歎感我心子昂感遇不啻過
阮籍詠懷何念深匡章通國稱不孝夫子與遊仍禮貌
雖然前聖亦有云善與不善分惡好

文顯和答旦字韻詩再用前韻寄文顯

憶昔追隨昏復旦負郭雖賒足忘倦別之未覺夢魂疏
但恨有時音信斷世間變化何不有深谷寧須問高岸
我今瘦骨立如山君亦童頭不能亂君不見簞瓢自樂
保清名富貴失時多遠竄千年青史固茫茫精意所關
唯此段

達觀僧紹本年九十能記東坡建中靖國題詩
之事且云清都道士者坡同遊此寺坡題詩後
道士臨之而滅其迹為賦詩記此

老僧長生元祐年
龐眉皓首高頰頰
紛然送迎過雲烟
解記南歸玉局仙
清都道士同蹁躚
詩成忽俾如蛻蟬
嗟哉用心故可憐
那知海內爭流傳

鑑山主以天聖宣賜行道者五百金裝羅漢青
甕香爐為示復用韻

高林杲杲日欲出
却視諸山雲自入
道人導我啟圓龕
五百金仙爭突兀
耀州燒甕撲不朽
獅子座中蓮葉繞
亂餘得此鎮山靈
莫恨當時賜田少
世人變滅隨空雲

至人來往繇念根長眉下生會有辰摩挲笑視默與論
寄婺州喻良能叔奇

我家入婺四十里有竹叅天山崛起尋常一過故人飯
長是驅車不停軌去年偶為逃暑留禪房小憇清溪頭
君當適閩駐行李遣騎問我安與不我聞君來固驚喜
君亦怪我窮不死殷勤竟辱懷刺先我乃踉蹌成倒屣
相看問我今何如為言斑鬢甘泥塗君時新有阿兄戚
語及往事猶長吁君歸匆匆莫可挽劇談未了風吹斷

贈君不直一錢詩何以報之錦繡

假

蓄以詩送君君以所著二碑見答

明朝過君君且行我思重別難為情勞君下馬更握手
再三謂我頻寄聲別來僅可熟羊腍含薰待春蘭已發
擬將採掇慰離居路遠何緣置君側如君人才誰與儔
直諒豈下西京劉校讎祕府自能事何乃傳經瀕海州
吾君急賢每盱食詔書取士到微仄君今未免滯周南
諸公貴人曷逃責願君覓句勿自哀清尊無事日曰開
未有白地光明錦用作人間負販材

到家寄季承二首

相逢到別二十日披覽溪山駐行役淒涼浩蕩兩生境
意不求詩詩自得臨分不作珍重語顧欲倡酬詩卷覓
問君得此君何用云此相如家四壁杜陵囊帛解抹寒
陸生越橐千金直人言君侯真太癡君癡不癡君自識
向來已念修途苦還家作况初無愈嬌兒失乳索飯啼
病妻服藥思鹿脯關心藥裏詩自廢無復吟哦繼朝暮
與君定交且十年相從未有如君許信知此藥莫可常

後會驚心念風雨報懷安否比何如莫以素書慵不具
寄子暢文顯兼問僉判丈起居

昨憶長歌與君屬嗟爾明月悲黃菊問君得歸今幾日
我迺還家期未卜人生會合不可常何止有類參與商
月明固可共清影菊開安得同幽香安與慙想來自越
賀以羊酒生暖熟小人繆忝通家子不獲親陪上壽列
美君斑衣有餘歡憐我緼袍無乃單何當卒歲從周子
陋巷簞瓢忘饑寒

以歸來後與斯遠倡酬詩卷寄辛卿

人家餽歲何所為紛紛酒肉相携持我曹餽歲復何有
酬倡之詩十餘首緘封寄葉玄英方從人笑癡我自狂
狂餘更欲誰送似咫尺知音稼軒是公乎比復何所作
想亦高吟動清酌賓朋雜選孰為佳咸推楊范工詞華
我曹所樂雖小技歷古更今不能廢歲云暮矣勿歎窮
梅花爛漫行春風

寄莫萬安

天生尤物為民瘼荔枝奔騰自南海後來始說閩部採
亦有風人刺丁蔡嗟哉萬安十室邑橘比江陵梨號密
嘗聞舊日事包苴千數私家公百十莫侯為令知其然
罷獻初從使者先其餘詬病置不問貧友或乞捐餐錢
憶昨追隨秋政熱不但近公如玉雪別來已忽露為霜
當念相如多病渴

送周守二首

昔我移官皇恐灘緘詩送公因阿連轉頭梅事兩飄忽

我亦解秩當返轅
豈期邂逅客歸舍
逢公政成朝日邊
可無一語道離闊
顧待別後空闌干
我聞袁人道路言
往者頗病吏道煩
袁人僕公以為治
如赤子待父母安
問公治袁竟何如
寬不至弛嚴不殘
不惟民絕催科癥
吏亦不急惠文冠
太平官府見今日
珥筆舊俗略不存
簿書期會足閒暇
江山風月忘遊般
作堂園中視所尚
我所尊者房李韓
東西日月雙跳丸
後人思公面孱顏

尊德堂兩旁名晨
光夕照後名愛山

人言循吏治無迹
有如春風被田園

試看一一發生意從千百數何繇論淳熙聖人歎才難
得人之路無不殫而於守令最注意往往六察并郎官
少公適日與幾政仲氏力請得皖瀋公雖遲登玉笋班
持節其惠寡與鰥未知除書落何地我家懷玉江東山
勿言形迹暫云遠在處孰非千萬間

雨珠雨玉非禱粟雨

三雨字皆去聲

雨懸知勝珠玉去年病禱

祇如楚今歲應祈如撒菽黃雲割盡綠浪搖可實饑腸
慰枵腹微官但為斗食謀再拜題詩謝賢牧

早過桃川不能謁一卷走筆寄之

山蒼蒼水茫茫落月未落歸故鄉扁舟欲繫忽已遠隱
居不見遙相望思君山中煮白石歎我道上炊黃粱開
書視古常太息今人高處亦難及

泊舟桃花臺入妙香院

攜家本避長城戍孫子相仍住桃塢雖云秦暴賦可逃
後乃開通晉南渡當時未有神仙傳創自淵明詩五言
祇今圖畫遍四海樓臺樹木空蒼然玄都亦說桃千樹

夢得飄零因怨句未應只屬羽人家亦有因茲悟初祖
我州那得桃花臺臺下清溪轉石哀仙耶釋耶不可見
每一過之空繫纜

晨起聞杜鵑

水聲嘈雜蛙聲小客子披衣坐侵曉平生嗜懶每貪眠
行李催人未渠了不勝倦歎歌方苦更聽林間杜鵑語
杜鵑我豈不知歸淵明政為饑驅去

初六日絕湖

政爾喧逐浪如屋忽焉熨帖紋如縠大船雙櫓鳴鸛鵝
小艇孤橈亂鳬驚金沙聚聚列宿明君山宛宛修眉綠
囊無東絹畫無工為寫南征圖十幅

南風行十八日早作

吾聞黃帝張樂洞庭野始意莊生言故假又聞湘靈鼓
瑟進玄螭亦意屈子夸厥辭屬行洞庭四月半南風三
日吹不斷黃昏猶是天陸離午夜忽成雲片段病夫數
起不知睡數起側聽仍熟視恍疑帝樂尚鏗鉦又謂湘

絃發幽闕乃知二子元非虛吾聞自用耳目拘須臾月
落天向曉依舊南風波浩渺

遊山谷寺贈住山欽老欽嗣愚丘詩

少小已誦山谷文老大始遊山谷寺按詩尋境盡可得
落筆不容追一字舊聞是老詩有宗韓門更許愚丘雄
風流前輩曰已遠此道此山俱屬公

除夕萬安寄成父并示兒女

去年除夕遙憐汝今歲酒觴期對舉誰知人事若好乖

百里相望竟成阻去年雖深兄弟思兒女抱負有母慈
今年已作生死隔慟哭無地天使之哀哉一官竟何直
南北由人長役役屬兒無恨弟勿嗟來歲田廬當畢集

初六日阻風新淦二首

昨日北風猶可行今日北風不可撐雖無人止公無渡
馮河而死聖不與況我生平憂患多平陸徃徃愁風波
近連章貢遠鄱陽如此千濤萬浪何

北風不但江流白天色徃徃吹作陰漫云一水六十里

金少曰入公言 卷五
中有青山千萬尋人言下水必犇駛而獨於此成滯淫
鵝鵲屬玉爾自得短詠長歌吾亦任

投宿聖仙寮

晚發楓橋期宿聖仙寮大風逆面至已二鼓
叩門甚久老黃冠方出迎館予於一室有釀
存焉未熟沽舊酒而飲

已慚叩戶驚莊夢更喜置牀鄰畢甕新醅未熟不可嘗
舊酒雖漓聊入用道人深居怕賓客老子頻年慣行役細

聽木杪風向息起視月沈天正黑

宿合龍山達觀寺用張激達明壁間韻

遊山到處不擬出幾向官程問山入旁人笑我底悠悠
我亦應緣耶兀兀平生作詩忌大巧到此真成腸胃繞
試將閣筆罷褚生又病囊中此山少入山已破山中雲
出山定復松崖根合龍端為此得名達觀妙旨又莫論

博山道中

春陰春晴往復佳園花落去逢山花城中小駐欲十日

坐覺老眼孤芳華中國寺前慣休歇故向博山尋曲折
眼中奇處要使傳倚賴筆端真有舌

芙蓉道間二首

芙蓉山上芙蓉尖

土人語

向人咫尺分毫纖或如冠劍或

鳥獸令我左右頰窺覷平生退之南山句為渠特騁筆力
嚴那知刻畫果辨此造物至是無留纖

芙蓉山下芙蓉渡歷盡崔嵬何物路更觀溪水突人來
令我詩情雜欣懼與夫重說松原山如此積雨應生湍

從來潢潦無根源水收石露頃臾間

辰陽待嶽祠之命舟發武陵回寄從遊諸公

叔父風流元祐支清貧遠自相國時舊聞河朔人偉奇
元衡筆力猶可窺佳哉伯玉賢墳簾小阮亦與竹林期
兆民雖云非舊知知之正自梅花詩伯壽惟悴儒冠衣
十年不調長苦饑經明行修後所歸非吾光遠其誰推
洪文學問方築基基成可保無傾歌嗟我誤落東南陸
疏者迺親親異宜念我流轉終年疲去章已上歸俟之

或持酒肴或贈辭亦或眷眷江之湄數面成親還語離
前日之樂今日悲秋風颯颯衣披披山長水遠屬玉飛
高城望斷日已西望不可見令人思

明叔有語贈贛丞曾幼度次韻簡叔明并寄幼
度為明叔賦買江天詩

詩成要落天地間太虛明月相往還聲名或覺四海隘
身乃憔悴窮閑闕詩中妙理超生死何但不以彼易此
我來白下豈徒然簿書鳬鷺非吾事陳君一見投紵衣

刺天翼並青冥垂楚人不悞玉在璞山川終用駢之犂
曾侯顧識今已後因君示我詩到手不惟我輩獨識真
異饌珍羞甘衆口幾思插翅飛墮前漫看壁月缺復圓
符移催來定不遠拿音不見聞擔肩世人千金買婢媼
我視棄去如浮烟萬言杯水世所捐顧欲賴以無窮傳
次韻徐季純見貽

尺渾孰愈千丈清幽居何以爭城傾翱翔蓬蒿豈不遑
乃欲萬里勞蜚鳴文章縱云有定價瓦釜亦或能鏗鐃

知音固當屬善聽我初未鼓一再行鄭人之璞周死鼠
昧者自謂懷連城我于翰墨雖早嗜四五十今何情
元無小異君孰取矻矻便欲揚其名得非念我西南征
倦遊久意思傭耕少年不飲老更醒而衆紛紛多絕纓
屬君勿用揚其名臃腫拳曲能全生

畢叔文攜坡帖及與季真給事倡酬詩卷見訪
於邢大聲家相與觀之明日次韻淳熙癸卯正
月二十有一日也

精金美玉當難朽白衣蒼狗終何有胡為徑欲老東坡
應坐生時宿南斗何時斯文曰再中共推元祐超羣公
袞衣已易深夜古醴酒寧思客酒濃當年政化方隨日
詔訪賢良設科十玉堂發策肆雄深四海旁招無遁逸
緬惟貞觀圖凌烟功臣劒佩空蹌然未如武德藏書府
至今名字星曰懸君之曾祖我高祖想象聞風謂千古
書藏東里罔或存集喜西臺刊未覩相逢已足慰悲涼
墨妙更許窺家藏趣竒造異兩邢子置酒共親燈燭光

次韻斯遠同彥章見過之作

昔人結交談耳餘一朝變起肝腦塗吾曹結交自有道
嗜好又況子與余每憶見君吾里初中間去君落江湖
歸來忽忽夏復夏相過凡幾窮朝晡君家仲容亦吾徒
向來亦恨天一隅我今借屋得近市渠乃屏迹田間廬
吾曹與物自多忤頌詩讀書猶論古君才端可供王羞
而我不足供鼎俎胡為愛我不棄我匪但追隨仍晤語
南山有約不可渝可堪舊雨連今雨

次韻徐審知寄贈古句

倦遊歷落三載中重來觸事多不同
舊交雲散隔山嶽在者一二莫我從
新知喜獲徐孺子年少已有諸老風
譬之寶劍雖尚伏清夜往往舒長虹
惟君家學故有宗念我早日嘗登龍
周旋何止道疇昔玷缺便擬相彌縫
分攜轉眄且十日夢寐嘗若見德容
要裁短章寄離闌抒思苦窮無由豐
新詩忽來墮我側句法沈穩字亦工
寂寥此道幾欲息玄文縱在人非雄
吾君嗜好乃如此

誰為冀北真羣空我今百不一稱意顧賴交友忘終窮
茲焉得君益足賀自起酌酒澆塊骨滔滔原從濫觴至
君其勿憚尋尺庸異時相見定刮目敢作吳下舊阿蒙
因君我亦事穠裝瘡鹵要使成千鍾

呈審知

去年別君重九日君時貼作卧一室許我為我一入山
人事好乖言竟食一官我落江之西每附書來必以詩
宣心寫妙無不盡知君不累寒與饑念君見君何由得

江西水深波浪闊無何奄忽室人喪繫舟復在南山側
君來見我顏色好不但文章能合道信知木潤山有輝
盎背睟然眸子瞭向來之所未見書向我誦讀如貫珠
有時舉問不知對汗為淚背口輒呿嗟我忝惟十年長
學業無功時既往羨渠松栢拱把姿絕勝櫓櫓高尋丈
一官羈我端何為投劾歸來亦未遲豈惟問字當載酒
儻復借書仍一癡

呈葉懷寧陳參軍章簿公

潛山皖山烟雨昏山城索莫少所親令君邀我入山去
復道山流方四奔側聞剝啄來叩門疑匪索我云見存
已焉一見即傾倒乃與諸劉相弟昆因君又來驚坐陳
吾嘗同寮義世數不惟邂逅索詩卷更復追隨攜酒尊

呈任邕州詔子言

清江江上賢大夫我所識者向楊胡盤園近說在城郭
使君政剖邕州符笑談雖阻阻親顏色新詩往往流傳得
豈知舟楫復江湖飄飄又墮清江側向來一識苦無因

茲日何緣得造門要題詩句道所以行色蒼茫難具陳
盤園已成十年陰使君二毛殊未侵平生慷慨功名事
切勿戀此成遐心

用前韻呈碩父昆仲

嗟我失脚墮棘榛寸步有若千里行窮山自縛數椽屋
便認懷玉為里門扁舟泛從吳楚轉遠遊欲賦慚無文
他鄉喜見兩表弟把臂勞苦仍如勤夜窻歛坐屢續燈
有酒更倒樽如岑祗今一笑莫輕失轉首便恐成後今

要知後會渺何許慷慨忍對臨風襟故家如子未多有
立身行已須自欽不惟門戶在所寄異曰亦足張吾軍

曾季明經過相見聞壽岡先生掛冠之報且承

動靜因其歸賦古句寄呈用坡谷贈王慶源韻

夫子文章何所如高處直命騷為奴世人共誦詞人賦
不道雕蟲羞壯夫兒時聞公薜林社既見則喜已白鬚
公亦與我自言志笑謂此客向來無昨傳得官隸王都
且復將試齊相壺岐江嚴湍浪饒舌

頃聞公除車輅院
有寄公詩云當坪

峽江上山
水似嚴湍

愛公願公吾道扶今知謝事歸懸車食可無
肉寒須襦再三問公近起居復道今腴非昔癯君今好
去相與娛馬牛寧得加我呼絕代幽居在空谷市門三
五方當壚

戲呈喻叔奇丈

平生喻工部許我詩盟與邇來每見每忽忽倚賴深春
間歸路問我自行何所去告以吳門當小住問公公有
故人否為我畧營薪水助欣然惠我書一紙為我殷勤

談所以我云素書難送汝併復因之陳翫散公言於我
則厚矣楓落吳江自為累幸逃烏有一先生猶勝東城
老居士

坐間呈魯幼度兼屬陳明叔

三年幾度江天閣我爾相看兩牢落江山好處欲題詩
下筆逡巡媿吾弱詩中最愛魯贛丞恨渠不來俱此登
今最驅車叩吾門寒溫未了先覓君乃知吾人同臭味
識面聞風總相契一杯聊爾勞江山向來鬱鬱今開顏

留清江蒙簡兄壽玉徐兄思叔皆以文卷寵教
愧未有以謝又承壽玉枉示古句仍用鄙韻謹

次韻併呈二兄

客亭何以祛暑溽一時頓有此兩玉逃虛不用聽足然
醫俗寧須更栽竹平生韋布困藍縷敢並奇文森綺縠
愛而忘醜反譽我惠以大篇仍短幅頗思浹日相就談
應對先生媿空腹奈何別棹復催去一日十日寒且暴
兩君如此尚場屋吞舟詎可尋常瀆悵子薄官亦碌碌

政坐家貧耕不足

二日晚得少空偶閱杜集無何墜火焚者數葉
謹成古句致愧惜之意呈明叔仲威

去年鼠齧涪翁文今年火攻少陵詩雖云成毀有定數
天意於此可逆知我之所嗜何足計上有先墨顏之姿
况渠詩本貫忠義在處神物宜護持向來一字且莫補
脫此千百何繇追我詩不工空自欺天意豈欲警戒之
不然身當貧到骨俱應蓄此瑰瑋詞又疑風來勸勤讀

邂逅俾之遭禍奇平生學易未有得損益二卦須湛思
詩成書以示我友不惟自訟仍求規

莫萬安生日

員多闕少銓曹病陛下用人多擇令公今秩滿代未除
召節盡來人側聽我知天意從民欲要煖袴襦飽餐粥
遂令局促滯騰驤百里孰如天下福我官白下未識公
謠俗往往聞其風坐移不作趨走怕政喜官曹退食同
我嘗從容聽公說勞心撫字催科拙昔人如此號循良


歎息今時異途輟雖然自有公論在民之所言上其採
舉觴不但祝長年始立新秋甘雨霈

送趙一叔江西漕赴召代成父作二首

憶昨公持使節西迎公曾渡石田溪今公復因召節至
送公亦渡石田水公今西來又東去送迎車馬紛無數
我雖憔悴不如人倚賴故情慚一顧

阿兄今得太和官買舟同載初不難公持使節豫章郡
慚以過公道窘寒公今召節趨日邊我雖失望猶欣然

西江恩波千萬里活此枯魚當易爾



淳熙稿卷五